

Arkiv	Saksbehandlar	Møtedato	Sak nr.
613.1	Knut Øyjordet	24.09.21	30/21

## SPØRSMÅL OM Å STOPPE JAKTA PÅ RYPE

*Saksdokument:*

1. Sakene 2/21 og 29/21 i fjellstyret.

*Saksutgreiing og vurdering:*

I sak 2/21 om opplegget for småviltjakta vedtok fjellstyret følgjande:

*For småviltjakttopplegget i Langmorkje statsallmenning meiner fjellstyret generelt at det må leggast til rette for eit variert og godt tilbod om småviltjakt, både når det gjeld tilbod om kort og jakttid på dei ulike artane. Sidan det for enkelte artar kan vera store årlege variasjonar i produksjonen og dermed bestandsstorleik, slik som lirype og fjellrype, er det viktig for fjellstyret med ei kunnskapsbasert forvaltning basert på fakta om bestandsstorleik i området til kvar tid, og eventuelt innføre ekstra reguleringar i år med låg produksjon. Fjellstyret vedtek følgjande opplegg for småviltjakta i Langmorkje statsallmenning frå 2021 og inntil vidare:*

1. *Jakttid og korttypar for innanbygds jegerar med og utan hund blir som tidlegare, dvs. fritt kortsal og med jakttid 15.09 – ut februar for dei utan hund og 15.09 – 23.12 for dei med hund.*
2. *For innanbygds med harehund, blir det vidareført det frie kortsalet i tida 15.09 – 24.09 og i tida 01.10 – ut februar.*
3. *Med bakgrunn i auke av talet på utanbygds jegerar utan hund over tid og spesielt dei siste tre åra, blir det innført ei regulering av antal jegerar dei første 15 dagane fordelt på tre 5-dagarsperiodar, dvs. 125 kort i tida 15.09 – 19.09, 125 kort i tida 20.09 – 24.09 og 125 kort i tida 25.09 – 29.09. Dette for å redusere jakttrykket i starten og få fordelt jegerane meir over tid. Frå 30.09 og ut februar blir det fritt kortsal.*
4. *Tilbodet om jaktkort til utanbygds med fuglehund blir vidareført som i dag, med 35 kort i tida 15.09 – 19.09 og 35 kort i tida 20.09 – 24.09 fordelt på tre jaktfelt.*
5. *For å gje utanbygds med fuglehund eit ekstra tilbod, kan det med grunnlag i kunnskap om årets produksjon bli opna for eit avgrensa dagskortsal seinare på hausten, slik det har vore praktisert dei seinare åra.*
6. *Tildeling av jaktkort til utanbygds med harehund blir vidareført som i dag med 25 kort i tida 11.10 – 17.10, og med fritt kortsal i tida 18.10 – 23.12.*
7. *Fjellstyret vil vidareføre bruk av dagskvoter for jakt på rype. Det kan setjast ulik kvote for lirype og fjellrype, og ulik kvote gjennom sesongen, t.d. ei lågare kvote for vinterjakt. Det kan også i enkelte år bli aktuelt å vedta sesongkvote/periodekvote.*
8. *For jakt på andre artar enn rype, skogsfugl og hare, kan det bli jakta på dei artene som det i forskrift frå Miljødirektoratet er gjeve løyve til å jakte på. For alle desse artene er tidlegaste jaktstart den 15. september, med unntak av jakt og fangst på dei artane som det er opna jakt på gjennom ordninga for smårovviltjakt i Vågå.*
9. *Snarefangst av rype er ikkje lov.*

I sak 29/21 om kvote på rypejakt sesongen 2021/22 vedtok fjellstyret følgjande:

*Med heimel i fjellova § 23 vedtek fjellstyret for jaktsesongen 2021/22 å nytte ei kvote på 1 lirype/fjellrype pr. jeger pr. dag. Vedtak om dagskvote på 1 rype blir gjort med bakgrunn i resultat frå takseringar, bruk av treningsfeltet og andre tilbakemeldingar. Det blir vist til vedtak i fjellstyresak 2/21 om opplegget for småviltjakta elles. Dersom det viser seg nødvendig med andre reguleringar undervegs i jakta, som t.d. stuttare sesong, ytterlegare regulering av jaktkortsal osv, så vil det bli tatt stilling til dette utover hausten når vi veit endå meir om årets produksjon.*

Med kunnskap om rypebestanden før jakta, og nå etter bortimot 10 dagar med jakt, er det berre å konstatere at det er eit dårleg produksjonsår for rype, spesielt lirypa. Men også for fjellrypa er det ein tilbakegang i bestanden sett i forhold til eit normalår. Vi må truleg heilt tilbake til 1995 for å finne tilsvarende produksjonssvikt for lirypa, men i 2009 var det også dårleg med rype i Langmorkje, både lirype og fjellrype. Og at dette skulle skje i år er svært overaskande for dei aller fleste, når det var såpass bra med stamfugl i vinter/vår og med ein vårsommar som vi skulle tru var ideell for rypa både før, under og etter klekkeperioden. Årsaker til den dårlege produksjonen blir berre synsing og spekulasjonar, det er berre å konstatere at svingingar i rypebestandar på langt nær er forutsigbart. I andre delar av landet er det visstnok eit godt år, men i vårt distrikt er det generelt dårleg.

Med så låg produksjon av rype, er det naturleg å vurdere endå meir innskrenking i jakta enn det som allereie er vedteke ang. kortsal og dagskvote. Tida er nå inne til faktisk å vurdere og stoppe jakt på rype for resten av sesongen. Dette er i tråd med tidlegare fjellstyrevedtak, om å innføre ekstra reguleringar i år med låg produksjon. Ei eventuell freding bør bli innført frå 30. september etter at jakta i regulert periode for utanbygds jegerar utan hund er over. Denne reguleringa førte til langt færre jegere i starten av jakta samanlikna med tidlegare år då det var fritt kortsal. Og med ei dagkvote på 1 rype pr. jeger, så er jakt fram til og med 29. september ingen «risiko» i forhold til bestanden.

Det å frede rypa resten av sesongen er heimla i § 23 i fjellova, 3. ledd. Det er slik at kommunen skal kunne uttale seg dersom fjellstyret vedtek endringar i jakttida, men fjellstyret har tidlegare fått fullmakt frå kommunen til å innskrenke jakttida på rype dersom bestandsmessige forhold talar for at det.

Sjølv om vi ikkje kjenner godt nok til årets produksjon av orrfugl og storfugl ennå, så skal det ikkje vera bestandsmessige problem om det blir vidareført jakt på desse artane. Dette fordi det er ei utfordrande jakt og vanskeleg å få utbytte, noko som også tidlegare års jaktstatistikk viser. Dessutan må ein rekne med at jaktkortsalaet vil bli lågt når rypa blir freda.

### **Innstilling til vedtak:**

Med heimel i § 23 i Fjellova vedtek fjellstyret å stoppe jakta på både lirype og fjellrype frå og med 30. september og ut sesongen 2021/22. Bakgrunnen for dette er bestandsmessige forhold, dvs. at vi nå etter dei fyrtane dagane av jakta, med sikkerheit kan seie at årets produksjon generelt er dårleg. Fjellstyret meiner det difor er viktig å stoppe jakta nå for å sikre at det blir tilstrekkeleg med stamfugl for neste års produksjon.

Adresse	Telefon	Bankgiro	E-post
Postboks 16 2684 VÅGÅ	61 29 37 37	2085.25.13625	vaga@fjellstyrene.no

Jakt på dei andre småviltartane som det er opna for jakt på, blir som tidlegare vedteke. Det blir såleis fritt kortsal for utanbygds jegerar utan hund frå den 30. september og ut sesongen, og det frie kortsalet for innanbygds jegerar utan hund blir vidareført på vanleg måte, men det blir altså ikkje jakt på rype. Det same gjeld innanbygds jegerar med fuglehund. Jaktkortet for desse gjeld også for trening med fuglehund på rype i heile statsallmenningen.

For utanbygds jegerar med fuglehund, blir det ikkje opna for eit avgrensa dagskortsal seinare i haust slik det har vore siste åra. Det kan bli aktuelt å opne for eit tilbod om trening med fuglehund på rype. Dagle ledar får fullmakt til eventuelt å opne for eit slikt tilbod.

Utanbygds jegerar utan hund som allereie har løyst kort frå den 30. september før vedtak om freding av rypa, kan få tilbakebetalt kortprisen dersom det ikkje blir aktuelt å jakte.

**Vedtak:**

Samrøystes: Som innstillinga.

*Rett utskrift. Kopi til:*

Kommunen

Vågåmo, 24.09.21

Knut Øyjordet (e.f)

---

Adresse	Telefon	Bankgiro	E-post
Postboks 16 2684 VÅGÅ	61 29 37 37	2085.25.13625	vaga@fjellstyrene.no